

畿輔通志卷二百七十九

列傳八十七 列女三十五

國朝二十九 宣化 赤城 萬全 龍門 懷來

國朝

宣化府

宣化縣

都督盧抱忠妻毛氏年三十夫亡家復爲流寇所破自甘荼

苦撫子育民成立列膠庠壽至七十餘歲卒

縣志

總兵馬勝龍繼妻郭氏素明大義勝龍死桂林之難計至郭

嘆曰夫死忠妻死節義也遂自刎而死

府志

總兵甄奇傑妻熊氏御史熊偉女奇傑死於陣熊年二十有
八守節至七十三歲卒子洪猷世襲錦衣衛洪勳官守備洪
猷妻梁氏遊擊梁震朝女亦早寡壽至七十一歲卒子國鼎

亦官守備

縣志

參政王天鑑妻張氏孝子王道舒子婦也事舅姑以孝稱

府志

憲副黃鉉妻劉氏以夫貴封恭人順治乙酉鉉死難揚州劉

青年孀守撫子元禧成立爲庠生元禧復早喪與子婦相依

苦守五十餘年卒年八十

縣志

生員甄奇才妻李氏年十八夫亡流賊入境恐被辱奮身投井救之得不死壽至七十有一子洪功官把總

都司甄洪略妻劉氏遊擊劉光正女夫亡安貧守節卒年八

十有一撫孤國琮爲庠生

俱同上

安進功女二姐進功客於外後妻某氏不守婦行懼爲女所訐與所歡謀並汚女以滅口二姐不從遇害康熙二十六年

旌

大清一統志

邵士俊妻江氏年二十五夫亡苦志守節撫子祚昌成立既娶早喪妻黑氏年二十遺孤顯謨甫周晬紡績養姑值歲荒薪米騰貴江不忍以己累婦欲自經黑偵知泣諫乃止里人高其節爲置產贍焉當事屢旌其門

府志

都司姚永燾妻杜氏永燾死於難杜矢節教子之愷成名孫

文光亦成進士官知府

同上

王馨妻張氏夫早亡張矢志撫子子婦亡復撫孫成立壽至八十餘歲子秀民孫謙相繼成諸生

縣志

千戶王登舉妻楊氏夫明季死於陣楊青年守節撫子成立卒年七十有一

王天鼎妻李氏年二十三夫亡甘貧守節子卿已五齡撫之成立壽至八十有三卒學使吳旌其門

指揮使陳文獻妻江氏明參將江萬仞女年二十九夫亡子幼值流寇焚掠之餘艱苦守節三十餘年撫孤成立壽六十有四

監生王家楨妻李氏年十四于歸二十八夫亡孝事舅姑守節三十餘年撫子燮照成立爲庠生雍正元年旌

府志兼採縣志

拔貢姚之益妻王氏年十九于歸越七年夫亡善事舅姑教子文耀力學後官羅山令王壽至七十餘歲雍正二年旌生員黃浩妻閻氏年十四于歸二十八夫亡時祖姑及姑俱在堂事之惟謹撫二子成立次子爲庠生閻卒年七十有一雍正三年旌

仇茂德妻袁氏年二十三夫亡撫孤禹錫入庠早喪復撫二孫成立長孫醅以明經官贊皇訓導袁壽至八十有五雍正

三年旌俱同上

生員韓霖妻劉氏年二十六夫亡事親撫子艱苦備嘗雍正

三年旌雍正志

郭昌治妻王氏年二十夫亡矢志撫孤守節四十七年

楊盛東妻黑氏年二十六夫亡翁姑繼歿拮据坐葬俱雍正

四年旌府志

監生王家正妻李氏夫亡守節四十六年孫好正妻李氏年

二十一夫亡守節三十九年韓奇妻武氏年二十六夫亡武

定疆妻冀氏年二十六夫亡守節四十五年雷敷樞妻徐氏

年二十六夫亡俱養親撫孤矢死不二雍正四年并旌

知縣高聯捷妻張氏年二十于歸克敦婦道越九載夫亡孝

親撫孤守節四十五年壽七十四卒二子俱早歲遊庠雍正

五年旌俱同上

生員劉聖愁妻邵氏年二十五夫亡事翁姑克盡孝養撫夫

前室子如已出守節三十餘年雍正八年旌府志兼採雍正志

生員張元惇妻王氏年二十六夫亡教子楚俊入庠以勤勞

致疾卒年五十有一雍正九年旌府志

武進士劉光弼妻王氏逮事重堂以孝聞年二十五夫亡繼

姑欲令改嫁不從撫二子成立守節三十八年雍正十年旌

雍正志

生員曹懷恩妻吳氏年二十五夫亡家貧姑老撫兩子成立

次子鎮成諸生守節三十八年卒年六十有二雍正十年旌

雍正志兼採府志

生員馬祥圖妻鄒氏年十五于歸克盡婦職二十七夫亡撫

子天行成立登甲午武科雍正十年旌

縣志

生員胡蛟龍妻蔡氏年二十八夫亡家貧以縫織養姑撫兩

子俱入庠守節三十八年雍正十年旌

府志

仇禹量妻邢氏年十四于歸事孀姑以孝聞二十五夫亡撫

兩孤泓洵俱入庠守節四十二年卒年六十有七雍正十一

年旌

府志兼
採縣志

生員楊承恩妻陳氏年十六于歸二十七夫亡甘貧撫孤守

節四十五年卒年七十有二雍正十一年旌

縣志

段錦妻郭氏年二十七夫亡事重堂循禮無闕子天復撫孫

成立守節三十七年雍正十一年旌

府志

王鳳妻張氏年二十八夫亡撫孤成立守節三十六年同時

生員張允德妻趙氏年二十八夫亡事姑撫子守節四十年

均於雍正十一年旌

姚廷極妻劉氏年十六于歸期年夫亡孝事舅姑無子撫夫
姪爲嗣教之力學入庠雍正十二年旌

李福全妻武氏年二十二夫亡撫前室子成立王之喬妻陳
氏年二十八夫亡孝事舅姑武守節三十年陳守節三十六
年均於雍正十二年旌

冀永祿妻高氏年二十八夫亡守節三十一年劉玉鼎妻李
氏年二十七夫亡守節三十年董應發妻殷氏年二十一夫
亡守節三十年李俊雍正志下有烈字妻牛雍正志作劉氏年二十八夫

亡守節三十九年俱孝事翁姑撫子成立雍正十二年旌俱同

上案雍正志載李俊烈妻劉氏守節年分與此李俊
妻牛氏同疑府志俊下脫烈字劉牛聲誤也今並存之

薛宗州妻楊氏夫爲營兵夫弟宗寶素無賴一日乘兄出戲

其嫂楊厲聲詈罵被害雍正十二年旌

大清一統志並雍正志

李智妻楊氏年二十六夫亡逾三日自經柩前面色如生雍正

十三年旌

府志

王汝弼繼妻宋氏年二十四夫亡守節四十四年巡檢黃進

功妻王氏年二十八夫亡守節三十四年生員康德顯妻白

氏年二十三夫亡守節三十四年俱撫孤成立雍正十三年

旌

何重耀妻孫氏年二十一夫亡事舅以孝撫子女恩勤備至

丁啟泰妻馬氏年二十五夫亡孝養祖姑女紅自給閭嘉祚

妻馬氏年二十八夫亡撫孫成立孫守節三十年啟泰妻守

節三十四年嘉祚妻守節五十一年俱雍正十三年旌

霍成印妻馮氏年二十五夫亡李郁妻王氏年二十四夫亡

俱孝親撫孤冰操自勵馮守節四十九年王守節四十八年
均於乾隆元年旌

王世皋妻高氏年二十七夫亡孝事孀姑撫孫成名董元妻
楊氏年二十九夫亡艱難勵志教子有方高守節四十六年
楊守節三十一年均於乾隆三年旌

牛世儒妻仙氏年二十九夫亡守節三十二年褚世炳妻黃
氏年十九夫亡守節三十三年生員王汝霖妻冀氏年二十
九夫亡張士恆妻靳氏年十九夫亡守節五十一年監生郭
家珍妻楊氏年二十二夫亡守節三十一年皆善事舅姑撫
嗣子成立乾隆四年旌

李自馨妻喬氏年二十六夫亡孀姑幼子茹苦相依子長復
天卒無他志守節四十一年乾隆四年旌

王士琳妻楊氏年二十夫亡遺孤復天依夫弟存活守節五
十一年乾隆四年旌

王文麟妻葉氏年二十六夫亡克盡婦道教子力學入庠守
節三十一年乾隆五年旌

舉人魏之樞聘妻王氏通州王權女未婚之樞卒王年二十
有二奔喪持服孝事舅姑守節三十年撫夫姪以繼宗祀乾

隆五年旌

通州志

姚廷槐妻李氏年二十七夫亡守節二十七年于養志妻王
氏年二十三夫亡守節四十二年王永吉妻郭氏年二十九
夫亡守節四十三年石永妻孔氏年二十九夫亡守節三十
一年俱養親撫孤無虧婦職乾隆六年旌

黑常昇妻高氏年二十六夫亡張希浚妻姚氏年二十八夫

亡俱矢志撫子成立高守節三十八年姚守節三十六年均於乾隆七年旌

魏廷賓妻王氏年二十六夫亡胡以澍妻楊氏年二十七夫亡俱事姑盡職教子有方王守節二十餘年楊守節三十餘年均於乾隆七年旌

閔全妻王氏年二十七夫亡守節家貧以紡績養姑厯艱苦數十年乾隆八年旌

陳國懷妻孫氏夫亡事舅姑能孝撫子成名官千總乾隆九年旌

谷成妻白氏夫亡遺孤三歲白哀毀絕飲食姑婉曲訓諭乃忍慟終喪以節孝著乾隆十年旌

丁才妻孔氏才病篤以母老子幼託孔再三慰之及歿事姑

撫子不負遺言守節五十餘年乾隆十年旌

生員趙廷敬妻朱氏夫疾篤謂朱曰我死無子若可毋守及亡母家亦諷之誓死靡他時年二十有一夫兩弟俱早亡弟婦張氏李氏亦以節顯乾隆十年旌

陳祿妻張氏聞昌祚妻郝氏仝進福妻張氏俱夫亡守節養親撫子乾隆十一年旌

生員許賓妻王氏李名卿妻張氏俱青年守節貧苦撫孤成立乾隆十三年旌

冀國樑妻郭氏夫亡家計艱難養老撫孤藉女紅度日孝慈兼盡乾隆十三年旌

張士奇妻潘氏奇以營卒從軍死潘聞訃痛不欲生旣念翁姑年邁奉侍無人遂忍死撫嗣以守乾隆十五年旌

王之畿妻蕭氏夫早亡姑喪明左右扶持歷久不懈王元功妻張氏年二十二夫亡事舅撫孤以終蕭於乾隆十八年旌張於乾隆二十二年旌

生員黑天潢妻張氏管有功妻宋氏梁邦鉅妻任氏俱夫亡撫孤守節終身

俱同上

劉佩文妻王氏年十七于歸生子越二年夫亡守節孝事翁姑教子若孫各盡其職年七十三卒學使表其門曰栢貞荻教旌表入祠

曹雲龍妻牛氏年十九于歸越十載夫亡孝事翁姑撫遺子繼業成立守節四十餘年學使杜表其門曰貞筠勵節

楊廷英妻程氏年十八于歸夫苦讀二十五夫亡矢志守節一子二歲早亡繼姪爲嗣教以經史以母兼師守節四十餘

年學使吳表其門曰節稟水霜

陳廷輔妻李氏年十六于歸越四載夫亡子仁甫二歲撫育成立入庠守節四十餘年學使杜表其門曰栢貞荻畫

孫厚德繼妻姚氏年二十八夫亡撫前室子繼紳成立領鄉薦己子繼紱成貢生有學行守節三十餘年

舉人張鶴齡子婦李氏年二十六夫亡守節四十四年

庠生任佶妻靳氏年二十四于歸越二載夫亡撫前室二子教以義方閨範嚴肅存年八十子媳俱年六十餘孫十人曾孫三人一堂四世

路錦雲妻馮氏年十七于歸三十夫亡遺子女各一守節三十八年存年六十有八

郭家瑛妻雷氏年十八于歸二十五夫亡撫二子成立娶婦

早世復撫幼孫守節四十餘年

劉世繼妻張氏年二十四夫亡事兩代孀姑承歡不怠撫教嗣子如己出守節二十三年同治八年旌

靳連科妻程氏年二十一于歸二十三夫亡苦志守節存年六十

郭存憲妻趙氏年二十九夫亡孝事翁姑撫教三子二孫俱入庠邑令方表其門曰栢貞萱壽同治十年旌

州同王大魁母郝氏年十六夫亡姑欲奪其志誓不改適曲盡婦道守節六十餘年已旌表建坊

張雲慶妻田氏年三十夫亡上事翁姑下撫孤子守節五十年太守表其門曰壽徵栢

庠生高國旺母張氏年三十夫亡撫二子一女守節三十五

年卒年六十有七

樊萬成妻孫氏年十七于歸越十年夫亡撫孤成立守節四十年

成家福母王氏年十九于歸二十九夫亡撫孤成立守節五十年

陳國泰妻姚氏年三十夫亡家貧撫孤成立同治十年卒守節三十八年

曹萬如妻溫氏年二十夫亡孝養翁姑子方二歲撫之成立守節三十年存年五十有一

庠生馬壯圖妻黃氏年二十九夫亡撫孤成立入庠守節三十一年

庠生馬殿圖妻梁氏年二十夫亡守節四十二年卒